

BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
Broj: 01-02-3/99
Sarajevo, 10.02.1999.godine

Z A P I S N I K

4. sjednice Predstavničkog doma Parlamentarne skupštine Bosne i Hercegovine, održane 10.februara 1999.godine

Sjednica je počela u 11,25 sati.

Sjednicom je predsjedavao Halid Genjac, predsjedavajući Predstavničkog doma Parlamentarne skupštine Bosne i Hercegovine.

Pored poslanika, sjednici su prisustvovali; članovi Vijeća ministara Bosne i Hercegovine ambasador Hans Šumaher, zamjenik Visokog predstavnika; predstavnici OSCE-a i predstavnici sredstava informisanja.

Predsjedavajući je prije predlaganja dnevnog reda pozvao ministre i zamjenike ministara, koji su izabrani na prošloj sjednici, da pristupe činu davanja svečane izjave.

Poslanik Nikola Špirić je ispred SDS i SRS RS istakao da neće prisustvovati činu davanja svečane izjave, s obzirom da su pokrenuli spor kod Ustavnog suda BiH za ocjenu ustavnosti i zakonitosti izvršenog izbora kopredsjedavajućih i članova Vijeća ministara BiH.

Svečanu izjavu dali su potpredsjedavajući, ministari i zamjenici ministara u Vijeću ministara BiH.

Predsjedavajući je konstatovao da sjednici prisustvuje 36 poslanika (23 sa teritorije Federacije Bosne i Hercegovine i 13 sa teritorije Republike Srpske) i konstatovao da postoji kvorum za pravovaljano odlučivanje u Predstavničkom domu. Napomenuo je da je na sjednici Kolegija održanoj 26. januara 1999. godine za 4. sjednicu dogovoren sljedeći

DNEVNI RED

1. Nacrt zakona o državnoj himni BiH
2. Razmatranje i usvajanje Zakona o državljanstvu,
3. Razmatranje i usvajanje Zakona o zastavi BiH
4. Razmatranje i usvajanje Zakona o grbu,
5. Razmatranje i usvajanje Zakona o telekomunikacijama,
6. Prijedlog zakona o izmjenama i dopunama Zakona o imunitetu,
7. Donošenje Odluke o osnivanju privremenog Sekretarijata Parlamentarne skupštine BiH,
8. Poslanička pitanja.

Zamjenik predsjedavajućeg Mirko Banjac je predložio da se u dnevni red uvrsti donošenje Odluke o simbolima BiH.

Poslanik Zlatko Lagumdžija je predložio da se u dnevni red uvrste četiri zakona koje su do sada predložili poslanici.

U diskusiji su učestvovali: Mara Perkanović, Nikola Špirić, Miodrag Deretić, Vito Rakić, Branko Dokić, Ivo Divković, Zlatko Lagumdžija, Nedžad Branković, Edhem Bičakčić i Abdurahman Malkić.

Skupu se obratio i gosp. Hanns Schumacher, zamjenik Visokog predstavnika.

Poslanik Branko Dokić je predložio da se na sjednici ne razmatraju zakoni koje je na privremenim osnovama donio Visoki predstavnik.

Nakon usaglašavanja predstavnika političkih stranaka, predložen je sljedeći

DNEVNI RED

1. Prijedlog zakona o državnoj himni BiH,
2. Prijedlog zakona o izmjenama i dopunama Zakona o imunitetu,
3. Odluke o osnivanju privremenog Sekretarijata Parlamentarne skupštine BiH,
4. Zaključak kojim se utvrđuje način procedure za donošenje zakona i drugih akata čiji predlagač nije Vijeće ministara BiH i Predsjedništvo BiH,
5. Poslanička pitanja.

Predloženi dnevni red je jednoglasno usvojen.

Ad.1. Prijedlog zakona o državnoj himni BiH

Predsjedavajući je obavijestio prisutne da je Ured Visokog predstavnika dostavio novi tekst Prijedloga zakona o državnoj himni BiH uz napomenu da je poslanicima dostavljen i Izvještaj Komisije o ustavnim i pravnim pitanjima o ovom zakonu.

Zamjenik predsjedavajućeg Mirko Banjac je predložio prije početka rasprave o ovoj tački dnevnog reda da Predstavnički dom donese Odluku o simbolima BiH koja bi se uputila Predsjedništvu BiH na potvrđivanje.

U diskusiji su učestvovali: Alma Čolo, Branko Dokić, Haris Silajdžić Edhem Bičakčić.

Prijedlog da se glasa o donošenju Odluke o simbolima BiH nije usvojen jer nije dobio potrebnu većinu glasova (11 glasova za, 3 protiv i 20 uzdržanih).

Rasim Kadić, predsjedavajući Komisija za ustavna i pravna pitanja je upoznao poslanike da je Komisija za ustavna i pravna pitanja zajedno sa zamjenikom Visokog predstavnika razmatrala amandmane na tekst Prijedloga zakona.

U raspravi su učestvovali: Miodrag Deretić, Ibrahim Spahić, Nikola Špirić, Hilmo Neimarlija, Suada Mumnagić, Mirko Banjac, Vito Rakić, Desanka Rađević, Zlatko Lagumdžija, Ivo Lozančić, Pero Skopljak i Branko Dokić.

Zakon o državnoj himni Bosne i Hercegovine je usvojen sa sljedećim izmjenama i dopunama:

- U članu 1. riječ "Državna" se briše.
- U članu 2. iza riječi "Naziv" riječ "Državne" se briše.
- U članu 3, 4. i 5. riječi "Državna" u određenim padežima se brišu.

- Tačka 4. člana 6. “U drugim prilikama u skladu sa Ustavom i zakonima Bosne i Hercegovine” dodaje se članu 5. kao tačka 4., a ostali dio teksta člana 6. se briše.

- Član 7. postaje Član 6. koji se mijenja i glasi: “Nepoštivanje himne će se sankcionisati posebnim zakonom”.

- Član 8. postaje Član 7.

Poslanici su saslušali sve tri predložene melodije himne: “Intermezzo”, “Polyhymnia” i “Y”. Nakon toga za prijedlog melodije pod šifrom “Intermezzo” glasalo je 26 poslanika, od toga sa teritorije Federacije BiH 15 i 11 sa teritorije Republike Srpske, sa 5 glasova protiv.

Predsjedavajući je konstatovao da je prijedlog melodije pod šifrom “Intermezzo” dobio potrebnu većinu i nije bilo potrebe da se glasa o druga dva prijedloga.

Nakon toga prešlo se na glasanje o Zakonu o državnoj himni Bosne i Hercegovine u cjelini.

Predstavnički dom Parlamentarne skupštine BiH je sa 28 glasova za, 2 protiv i 1 uzdržanim kao i potrebnom trećinom glasova poslanika sa teritorije svakog entiteta usvojio Zakon o državnoj himni Bosne i Hercegovine.

Poslanik Mirko Banjac je predložio da se autoru melodije pokloni umjetnička slika sa potpisima poslanika što je aklamacijom i prihvaćeno.

Poslanik Rasim Kadić je predložio da Predstavnički dom donese zaključak kojim bi se obavezalo Vijeće ministara, konkretno Ministarstvo civilnih poslova i komunikacija, kada Zakon o državnoj himni BiH stupi na snagu, svim zainteresovanim javnim institucijama na koje se odnosi izvođenje himne BiH u najkraćem roku dostavi kvalitetne kopije tonskog zapisa himne, što je i prihvaćeno.

AD.2. Prijedlog izmjena i dopuna Zakona o imunitetu

Poslanicima su dostavljeni Izvještaji Komisije o ustavnim i pravnim pitanjima i Komisije o pitanjima ljudskih prava, imigracije, izbjeglica i azila koje su razmatrale prijedlog ovog zakona

U raspravi su učestvovali: Abdurahman Malkić, Nikola Špirić i Alma Čolo.

Prihvaćene su primjedbe pravno-tehničke prirode a koje se odnose na sljedeće:

- U članu 2. iza broja “4” dodaju se riječi: “i 7”.

- U članu 4. ispred tačke 1. dodaju se riječi: “Nadležni organi za oduzimanje imuniteta licima iz člana 3. ovog zakona su.”

Predstavnički dom Parlamentarne skupštine BiH je sa 24 glasa za, 4 uzdržana i potrebnu trećinu glasova poslanika sa teritorije svakog entiteta usvojio izmjene i dopune Zakona o imunitetu.

Ad.3. Odluka o osnivanju privremenog Sekretarijata Parlamentarne skupštine Bosne i Hercegovine

Kolegiji oba doma Parlamentarne skupštine BiH dostavili su Prijedlog odluke o osnivanju privremenog Sekretarijata Parlamentarne skupštine Bosne i Hercegovine na razmatranje i usvajanje.

U raspravi su učestvovali: Hilmo Neimarlija, Neven Tomić, Suada Muminagić, Rasim Kadić, Alma Čolo, Branko Dokić i Ana Havel.

Prije glasanja prihvaćen je prijedlog da se u tački III Odluke rok od "60" dana zamijeni rokom od "30" dana.

Predstavnički dom Parlamentarne skupštine BiH sa 20 glasova za, od toga 12 sa teritorije Federacije BiH, 5 sa teritorije Republike Srpske i potrebnom trećinom glasova poslanika sa teritorije svakog entiteta usvojio Odluku o osnivanju privremenog Sekretarijata Parlamentarne skupštine Bosne i Hercegovine.

Ad.4. Zaključak o proceduri donošenja zakona i drugih akata

Komisija za ustavna i pravna pitanja je predložila Zaključak kojim se utvrđuje način procedure za donošenje zakona i drugih akata čiji predlagač nije Vijeće ministara BiH i Predsjedništvo BiH.

U raspravi su učestvovali: Hilmo Neimarlija, Neven Tomić, Suada Muminagić, Rasim Kadić, Alma Čolo, Branko Dokić i Ana Havel.

Zaključeno je da se svi do sada podneseni zakoni upute Vijeću ministara BiH radi davanja mišljenja i razmotre na prvoj narednoj sjednici.

Predstavnički dom Parlamentarne skupštine BiH je sa 24 glasa za, bez glasova protiv i uzdržanih, usvojio Zaključak kojim se utvrđuje način procedure za donošenje zakona i drugih akata čiji predlagač nije Vijeće ministara BiH i Predsjedništvo BiH.

Ad.5. Poslanička pitanja

- Poslanik Ibrahim Spahić je postavio pitanje roka izrade stalnog Poslovnika Predstavničkog doma. Takođe je inicirao donošenje odluke o profesionalizaciji poslanika, te sugerisao Sekretarijatu Parlamentarne skupštine da je potrebno poboljšati uslove rada novinara i drugih predstavnika sredstava informisanja.

Takođe je zatražio od Ministarstva vanjskih poslova izvještaj o međunarodnom položaju Bosne i Hercegovine i inicijativama koje BiH ima u vezi ekonomskih i političkih pitanja koja se odnose na jačanje pozicije BiH, kao i pregled aktivnosti MIP-a u proteklom periodu. Na ovo pitanje ministar vanjskih poslova je dao odgovor poslaniku Spahiću.

Poslanik je takođe postavio pitanje da li unutrašnja organizacija MIP-a, obuhvata međunarodnu, kulturno-prosvjetnu, naučno-tehničku, sportsku i svaku drugu vrstu saradnje, te smatra da bi ove oblasti morale biti regulisane na nivu države.

- Poslanik Branislava Jovanović predložila je da se ispred Predstavničkog doma uputi zahtjev Vijeću ministara i Predsjedništvu BiH u pravcu planiranja sredstava u budžetu koja bi se izdvojila za nabavku vozila za prevoz poslanika.

- Poslanik Mediha Filipović je postavila sljedeće poslaničko pitanje: “Da li se može ponovo aktuelizirati pitanje donošenja odluke o posjeti, odnosno najavi posjete parlamentaraca Bosne i Hercegovine parlamentarcima Republike Hrvatske”?

- Poslanik Branko Dokić zatražio je od Vijeća ministara da za narednu sjednicu pripremi izvještaj o svom budućem radu.

- Poslanik Abdurahman Malkić postavio je pitanje o podnošenju izvještaja o broju naturalizovanih, broju lica koja su izgubila državljanstvo BiH i broju lica koja su dobila državljanstvo druge zemlje, odnosno koja su se dobrovoljno odrekla državljanstva BiH u smislu člana 40. Zakona o državljanstvu.

- Poslanik Ivo Lozančić zatražio je od Komisije za ustavna i pravna pitanja odgovor u vezi mandata poslanika koji su istovremeno i članovi Vijeća ministara BiH, što je po njegovom mišljenju u suprotnosti sa Izbornim zakonom BiH.

Predsjedavajući je upoznao poslanike da su predsjedavajući komiteta ministara Vijeća Evrope i generalni sekretara Parlamentarne skupštine Vijeća Evrope izrazili želju da se 17. marta 1999. godine obrate Parlamentarnoj skupštini BiH u terminu od 11,00 do 12,00 sati, kada je potrebno i planirati zajedničku sjednicu oba doma Parlamentarne skupštine BiH.

Sjednica je završila sa radom u 19,20 sati.

Magnetofonski snimak sjednice čini sastavni dio zapisnika.

PREDSJEDAVAJUĆI
PREDSTAVNIČKOG DOMA
PARLAMENTARNE SKUPŠTINE BiH
dr. Halid Genjac, s.r.